

I. DISPOSICIÓN XERAIS

MINISTERIO DA PRESIDENCIA E PARA AS ADMINISTRACIÓN TERRITORIAIS

11821 *Real decreto 641/2016, do 9 de decembro, polo que se modifica o Regulamento xeral da seguridade social das Forzas Armadas, aprobado polo Real decreto 1726/2007, do 21 de decembro.*

A Lei orgánica 9/2011, do 27 de xullo, de dereitos e deberes dos membros das Forzas Armadas, regula as asociacións profesionais integradas por membros das Forzas Armadas para a defensa e a promoción dos seus intereses profesionais, económicos e sociais, fixa as normas relativas á súa constitución e ao seu réxime xurídico e crea un rexistro específico para estas asociacións no Ministerio de Defensa.

No título III, capítulo II, da Lei orgánica 9/2011, do 27 de xullo, regúlase o Consello de Persoal das Forzas Armadas, e establécese que nel terá lugar a participación das asociacións profesionais de membros das Forzas Armadas e a súa interlocución co Ministerio de Defensa. Dentro deste capítulo, no artigo 49.2 prevese que «os vogais das asociacións que formen parte do Consello elixirán, entre eles, ata tres representantes nos órganos de goberno ou dirección das mutualidades, asociacións e entidades de previsión social e asistencial cuxo ámbito de actuación inclúa membros das Forzas Armadas e as súas familias, cando así o prevexa a súa normativa específica».

No marco da atención social das Forzas Armadas cobra especial relevancia o réxime especial da seguridade social, que se xestiona a través do Instituto Social das Forzas Armadas, que é un organismo público adscrito ao Ministerio de Defensa que conta con dous órganos de goberno: o Consello Reitor e a Xunta de Goberno; a este último compete, entre outras funcións, estudar, emitir informe e elevar ao Consello Reitor as propostas relativas a medidas, plans e programas, convenientes para o desenvolvemento dos mecanismos de protección do réxime especial da seguridade social das Forzas Armadas. Por iso, recollendo o acordo do Pleno do Consello de Persoal, do 24 de marzo de 2015, considerouse oportuno que un representante das asociacións profesionais de membros das Forzas Armadas con representación no Consello de Persoal forme parte da composición da Xunta de Goberno deste organismo.

Agora ben, isto non debe supor a inaplicación do criterio de austeridade que, entre outros, motivou a aprobación do Real decreto 451/2012, do 5 de marzo, polo que se regula o réxime retributivo dos máximos responsables e directivos no sector público empresarial e outras entidades. O seu artigo 6 dispón que corresponde ao ministro de Facenda e Administracións Públicas a clasificación das entidades conforme a súa natureza e os criterios de clasificación previstos no artigo 5. Concretamente, no número 2 do mesmo precepto sinala que, salvo disposición legal en contrario, o número máximo de membros do consello de administración e órganos superiores de goberno ou administración das entidades non poderá exceder os 15 membros nas do grupo 1, os 12 membros nas do grupo 2 e os 9 membros nas do grupo 3.

Mediante a Orde do ministro de Facenda e Administracións Públicas, do 6 de xuño de 2012, apróbase a clasificación dos organismos autónomos e no seu anexo recóllese a correspondente a cada un deles. No dito anexo inclúese no grupo 2 o Instituto Social das Forzas Armadas.

De acordo con esta clasificación, a inclusión dun novo membro representante das asociacións profesionais fai necesario, para non superar o número máximo de membros da Xunta de Goberno do Instituto Social das Forzas Armadas, suprimir un dos vogais actuais. Para iso, débese modificar o Regulamento xeral da seguridade social das Forzas Armadas, aprobado polo Real decreto 1726/2007, do 21 de decembro.

Durante a súa tramitación, este real decreto recibiu o informe das asociacións profesionais con representación no Consello de Persoal das Forzas Armadas, conforme o artigo 40.2.b) da Lei orgánica 9/2011, do 27 de xullo, de dereitos e deberes dos membros das Forzas Armadas. Finalmente, consonte o establecido no artigo 49.1.c) da citada lei orgánica, recibiu o informe do Consello de Persoal das Forzas Armadas.

Así mesmo, conta co informe do Consello da Garda Civil.

Na súa virtude, por proposta conxunta da ministra de Defensa e do ministro de Facenda e Función Pública, de acordo co Consello de Estado e logo de deliberación do Consello de Ministros na súa reunión do día 9 de decembro de 2016,

DISPOÑO:

Artigo único. *Modificación do Regulamento xeral da seguridade social das Forzas Armadas, aprobado polo Real decreto 1726/2007, do 21 de decembro.*

O número 1 do artigo 14 do Regulamento xeral da seguridade social das Forzas Armadas, aprobado polo Real decreto 1726/2007, do 21 de decembro, queda modificado como segue:

«1. A Xunta de Goberno estará composta da seguinte forma:

- a) Presidente: o secretario xeral xerente do ISFAS.
- b) Vogais:

1.º Os directores de persoal dos mandos ou xefaturas de persoal dos tres exércitos.

2.º O xefe de Persoal da Garda Civil.

3.º O inspector xeral de Sanidade da Defensa.

4.º O subdirector de Prestacións do ISFAS.

5.º O subdirector económico-financeiro do ISFAS.

6.º O director xeral de Recursos ou membro do CNI en quen aquel delegue con rango, ao menos, de subdirector xeral.

7.º Un vogal en representación de todas as asociacións profesionais de membros das Forzas Armadas con representación no Consello de Persoal.

8.º O asesor xurídico do ISFAS, quen exercerá, ademais, a función de secretario.

9.º O interventor delegado do ISFAS.»

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 9 de decembro de 2016.

FELIPE R.

A vicepresidenta do Goberno e ministra da Presidencia
e para as Administracións Territoriais,
SORAYA SÁENZ DE SANTAMARÍA ANTÓN